

la foy, qui fans ceffe esclairoient fon esprit, & animoient quasi tous ses desirs; non seulement il en auoit les qualitez, mais aussi en auoit fait souuent l'office au peril de sa vie, n'y ayant lieu dans toutes ces contrées où de son viuât nous ayons mis le pied, que par tout il n'y ait presché hautement des grandeurs de celuy qu'ils deuoient adorer pour Dieu, & des obligations que nous auons au Sang & à la Croix de Iesus-Christ.

Mais tant s'en faut que la foy ait receu aucun dommage de ce coup dans le [19] cœur des Croyans que plustost elle semble s'estre affermie plus qu'auparuant.

Sa femme, qui sembloit deuoir estre la plus abbatuë de cet accident, nous a dit que lors que la nouvelle luy en fut apportée, elle demeura quelque tēps interdite, sans penser à rien, & que la premiere pensée qui luy vint, fut ce que si souuent elle auoit entendu dire au defunct en plusieurs occasions. *Celuy qui en est le maistre en a disposé de la sorte, qu'y ferions-nous?* Elle s'est en fuite comportée de la sorte dans son affliction, que ie ne sçai ce que pourroit faire de mieux vne des meilleures Chrestiennes de nostre Europe. Plusieurs de la famille nous ont dit que les discours que si souuent le defunct leur auoit faits pendant sa vie, ne les ayans point conuaincu de son viuant, au temps de sa mort, leur reuindrent dans l'esprit, & les toucherent si fort, qu'ils conceurent ce que iamais ils n'auoient bien entendu, & prirent resolution de changer de vie.

En effet son frere aîné nommé Teondechorren, qui auparavant n'auoit fait beaucoup d'estat de ses instructions, [20] & bons aduis, nous vint trouuer trois